



Newsletter

Maj, 2026.

Pet medalja za Denijala Begovića na "Aminess Mitingu Korkyra 2026"

Denijal Begović, stipendista Fondacije Hastor i član USR "EkoSport", ostvario je sjajan uspjeh na međunarodnom plivačkom takmičenju "9. Aminess Miting Korkyra 2026", održanom 25. i 26. aprila na Korčuli.

U izuzetno jakoj konkurenciji Denijal se okitio sa čak 5 medalja. Njegov impresivni nastup krunisan je s dvije zlatne medalje u disciplinama 50 i 100 metara leđno, dok je bronzane medalje osvojio u disciplinama na 100 i 200 metara slobodnim stilom, kao i na 100 metara delfin. Ovi zavidni rezultati potvrda su njegovog predanog rada, discipline i uspješnog usklađivanja školskih i sportskih obaveza. Posebno značajan segment nastupa jeste i ostvareno poboljšanje ličnih vremena, što potvrđuje njegov kontinuirani sportski napredak.

Plivanje je, kako kaže, važan dio njegovog života i sport koji ga je naučio disciplini, istrajnosti i odgovornosti. Sport traži mnogo odricanja, ali vas uči kako da postanete jači i bolji, ne samo kao sportista nego i kao osoba. Najvažnije je vjerovati u sebe, biti uporan i ne odustajati nakon prepreka ili lošijih rezultata. Iza svakog uspjeha stoji mnogo rada, truda i podrške porodice, trenera i ljudi koji vjeruju u vas, ističe Denijal.

Denijalov uspjeh predstavlja snažnu motivaciju za dalji rad i razvoj, ali i inspiraciju drugim mladim sportistima da se trud i upornost uvijek isplate. Važnu podršku na tom putu pruža Fondacija Hastor, koja kroz ulaganje u obrazovanje i razvoj mladih talenata nastavlja biti čvrst oslonac mladim ljudima u ostvarivanju njihovih ciljeva i uspjeha. Denijal ističe da mu stipendija predstavlja dodatnu motivaciju i sigurnost za nastavak njegovog razvoja.

Iako sam stipendista Fondacije Hastor tek odnedavno, već sada osjećam koliko znači imati podršku ljudi koji prepoznaju trud, rad i zalaganje mladih. Stipendija mi daje dodatnu motivaciju da nastavim raditi na sebi, kako u sportu, tako i u obrazovanju. Posebno me raduje prilika za volontiranje i upoznavanje drugih mladih ljudi koji dijele slične vrijednosti i želju za napretkom, rekao je Denijal.

Pripremila: Lamija Sejdić



Borislav Đekić – mladi karatista koji niže uspjehe

Ovog mjeseca predstavljamo vam i priču četrnaestogodišnjeg Borislava Đekića iz Nevesinja, odličnog učenika osmog razreda Osnovne škole "Risto Proroković". Borislav je dugogodišnji stipendista Fondacije Hastor, posvećeni volonter Crvenog krsta i uspješan karatista koji svojim trudom, radom i zalaganjem ostvaruje zapažene rezultate. Karate trenira već sedam godina u karate klubu "Velež", a ni jednogodišnja pauza zbog zdravstvenih problema nije umanjila njegovu ljubav prema ovom sportu.

Karate za mene predstavlja mnogo više od običnog treninga – to je mjesto gdje se osjećam prihvaćeno, sigurno i sretno. Treninzi su mi pomogli da razvijem koncentraciju, odgovornost i upornost, ali i da steknem nova prijateljstva i lijepa iskustva, navodi Borislav, ističući i značaj svojih trenera koji su mu kroz godine bili velika podrška i motivacija.

Borislav iza sebe već ima brojna takmičenja, medalje i uspomene. Ove godine ostvario je značajne rezultate – na regionalnom takmičenju u Bileći osvojio je prvo mjesto, dok je na Prvenstvu Republike Srpske zauzeo drugo mjesto u svojoj kategoriji. Posebno mu je značajna medalja osvojena u Goraždu, gdje je nastupao u većoj kategoriji, što je za njega predstavljalo veliki izazov i potvrdu da trud i rad donose rezultate.

Kao neko ko je već šest godina stipendista Fondacije Hastor koju smatra velikom podrškom i mjestom gdje je kroz različite aktivnosti stekao brojna znanja i vrijedna iskustva, Borislav posebno ističe važnost mentorica koje su uvijek bile spremne pomoći i objasniti svaku temu, ali i motivirati stipendiste da rade na sebi i svom obrazovanju.

Fondacija Hastor pokazala mi je koliko su podrška, znanje i zajedništvo važni za mlade ljude, kaže Borislav koji je kroz Fondaciju razvijao samopouzdanje, komunikacijske vještine, a stečena iskustva dodatno su ga motivirala da bude primjeren učenik i aktivan član svoje zajednice. Upravo zbog toga često preporučuje svojim vršnjacima da apliciraju za stipendiju i iskoriste priliku za lični razvoj.

Iako mlad, Borislav svojim primjerom pokazuje koliko su obrazovanje, sport i humanost važni za pravilan razvoj mladih ljudi: *Mladima bih poručio da vjeruju u sebe, da se trude i da iskoriste svaku priliku za učenje i napredovanje. Uz rad, upornost i prave ljude oko sebe, sve je moguće ostvariti.*



Intervju mjeseca: Ajna Zlotrg

Državna viceprvakinja u stonom tenisu

U svijetu vrhunskog sporta često slušamo o odricanju, ali rijetko imamo priliku upoznati nekoga ko s takvom lakoćom i osmijehom balansira između teških akademskih obaveza i sportskih postolja. U ovomjesečnom intervjuu vodimo vas u svijet brzine, nevjerojatnih refleksa i čelične discipline. Razgovarali smo s Ajnom Zlotrg, studenticom koja je na nedavnom državnom takmičenju u stonom tenisu osvojila sjajno drugo i treće mjesto. Za naš newsletter Ajna otkriva kako je ljubav prema ovom sportu naslijedila od porodice, kako pronalazi fokus u ključnim trenucima meča i zašto vjeruje da nas stoni tenis uči onim najvažnijim životnim lekcijama.



1. Kada ste se počeli baviti stonim teniskom i šta Vas je najviše privuklo ovom sportu?

Ovim se sportom bavim već dugi niz godina. Počela sam trenirati 2013. godine kao osmogodišnjakinja. Skoro svi članovi moje porodice u jednom su se periodu života bavili stonim teniskom, neki intenzivnije, a neki rekreativno, ali činjenica je da je to sport koji su svi voljeli. Zbog toga sam i sama razvila interesovanje za stoni tenis. Pored toga, ovo je veoma brz i dinamičan sport koji zahtijeva koncentraciju i fokus, razvija refleksive i trenira ne samo tijelo nego i mozak.

2. Kako uspijevate uskladiti akademske obaveze s treninzima i takmičenjima?

Nemam nikakav problem kada je riječ o usklađivanju stonog tenisa s akademskim obavezama. Iskreno, više se ni ne sjećam kako je izgledala moja rutina bez treninga i takmičenja. Navikla sam da mi je dan ispunjen i da, pored fakultetskih obaveza, imam i treninge, dok su vikendi uglavnom rezervirani za takmičenja. To mi je postalo svakodnevnica. Smatram da se uz dobru organizaciju i disciplinu sve može postići.

3. Da li je postojao neki poseban trenutak tokom takmičenja koji ćete posebno pamtit?

Osvajanje državnog juniorskog prvenstva 2024. godine definitivno je trenutak koji ću uvijek pamtit. Finalni meč igrala sam protiv svoje dobre drugarice, rezultat je bio 2:2 u setovima, a odlučujući set bio je veoma uzbudljiv i neizvjestan. Osjećaj sreće i olakšanja nakon osvajanja pobjedničkog poena nikada neću zaboraviti. To je bio psihički veoma težak meč, ali sam na kraju uspjela izaći iz te borbe kao pobjednica.

4. Šta Vas najviše raduje u stonom tenisku – pobjede, atmosfera na takmičenjima ili nešto treće?

Ja sam uvijek bila tip osobe koju najviše raduje atmosfera. Moji najbolji prijatelji i najdraže uspomene upravo su vezani za stoni tenis i zato toliko volim ovaj sport. Naravno, pobjede su također veoma važan faktor i uvijek težim ka njima, ali čak i kada dođe do poraza ili razočarenja, uživam u druženju i sportskoj atmosferi koju ovaj sport nosi.



5. Koji savjet biste dali mladima koji žele početi trenirati stoni tenis ili se ozbiljnije baviti sportom?

Voljela bih podstaći mlade da treniraju stoni tenis jer smatram da ovaj sport zaslužuje mnogo više pažnje nego što je trenutno dobija. To je sport koji razvija ne samo fizičke nego i mentalne sposobnosti, jer zahtijeva konstantan fokus, koncentraciju i razmišljanje, posebno ako se njime bavite na profesionalnijem nivou. Ali čak i rekreativno, stoni tenis odlična je opcija za fizičku aktivnost i može biti veoma zanimljiv. Generalno, svaki je sport prilika da izgradite sebe kao ličnost, razvijete disciplinu i upoznate sami sebe – kako reagirate nakon poraza, kako se nosite sa ljutnjom i srećom, koliko ste uporni i borbeni. Moj savjet mladima bio bi da pokušaju istrajati u treninzima čak i kada bude teško, jer upravo kroz taj proces najviše izgrađujemo sebe.

6. Kada biste mogli izdvojiti jednu stvar koju Vas je sport naučio, šta bi to bilo?

Među najvažnijim stvarima kojima me sport naučio jesu rad, red i disciplina – da je potrebno mnogo truda i vremena kako biste ostvarili ono što želite. Ali možda me naučio i nečemu što ljudi ne bi očekivali kao odgovor. Kroz stoni tenis shvatila sam koliko je istinita izreka da nada posljednja umire. Bezbroj sam puta doživjela, ali i vidjela kod drugih, da ljudi ne odustaju čak ni onda kada situacija djeluje gotovo nemoguće. Naravno da se uvijek treba boriti do kraja, ali postoje momenti kada su šanse za pobjedu skoro nepostojeće, kada je protivnik mnogo bolji ili kada gubite velikom razlikom. Ipak, do posljednjeg poena uvijek postoji ta nada da se može desiti preokret. Možda je to malo neobična stvar koju bih izdvojila, ali upravo to smatram jednom od najljepših lekcija koje mi je sport dao.

Pripremila: Adina Jusufspahić

Fragmenti volonterskih priča

Tokom mjeseca maja 2026. godine stipendisti Fondacije Hastor realizovali su niz značajnih volonterskih aktivnosti širom Bosne i Hercegovine. Kroz humanitarne, edukativne, zdravstvene, kulturne i društveno korisne projekte pokazali su da mladi ljudi mogu biti nosioci pozitivnih promjena u svojim lokalnim zajednicama. Svaka aktivnost bila je prilika za sticanje novih znanja, razvijanje životnih vještina i jačanje vrijednosti na kojima počiva djelovanje Fondacije Hastor – obrazovanje, humanost, solidarnost, odgovornost i aktivno građanstvo.

U Fojnici je, pod vodstvom mentora Adisa Akšamovića, realizovana aktivnost u saradnji sa Crvenim križem Fojnica. Stipendisti su se upoznali sa osnovama prve pomoći te kroz praktične vježbe učili kako pravilno reagovati u hitnim situacijama. Poseban fokus stavljen je na pružanje pomoći unesrećenim osobama, zaustavljanje krvarenja, imobilizaciju povreda i postupanje u slučaju gubitka svijesti. Ova aktivnost doprinijela je razvoju humanosti, odgovornosti i spremnosti mladih da pomognu drugima u trenucima kada je pomoć najpotrebnija.



U Gornjem Vakufu – Uskoplju, mentorice Amna Halilović i Hatidža Omeragić organizovale su edukativni obilazak kulturno-historijskih lokaliteta. Stipendisti su posjetili Sahat-kulu i Partizansko spomen-groblje, gdje su imali priliku upoznati bogatu historiju svog kraja. Kroz razgovore o kulturnoj baštini, antifašističkoj tradiciji i značaju očuvanja nacionalnih spomenika razvijali su svijest o važnosti zaštite kulturnog naslijeđa i aktivnog učešća mladih u njegovom očuvanju. Aktivnost je završena interaktivnim kvizom znanja i



U Sarajevu, stipendisti Fondacije Hastor predvođeni mentorima Amelom Asanijem, Amrom Imamovićem i Nejrom Čatić realizovali su projekat pod nazivom „Stop vršnjačkom nasilju“. Kroz radionice, edukativne sadržaje, grupne diskusije i kreativni rad učenici su učili o različitim oblicima vršnjačkog nasilja, njegovim posljedicama i načinima prevencije. Izrađeni su plakati, edukativni letci i poruke podrške kojima su promovirane vrijednosti tolerancije, prijateljstva i nenasilne komunikacije. Ova aktivnost pokazala je koliko mladi mogu doprinijeti stvaranju sigurnijeg i zdravijeg okruženja za svoje vršnjake.

U Perinom Hanu kod Zenice, pod mentorstvom stipendistice Sumeje Stabančić, realizovana je aktivnost pod nazivom „Prevenција spašava život“. Fokus aktivnosti bio je na starijim osobama kojima su pružene osnovne preventivne zdravstvene usluge. Kroz mjerenje krvnog pritiska, nivoa šećera u krvi, tjelesne temperature i saturacije kisikom, starijim građanima pružena je podrška i ukazano im je na važnost redovnih zdravstvenih kontrola. Aktivnost je imala poseban humanitarni značaj jer je kod učesnika razvijala empatiju, osjećaj odgovornosti i brigu za starije članove zajednice.

U Naseobini Lišnja kod Prnjavora, mentorice Nevena Božić i Nedeljka Dragojević organizovale su posjetu Ergeli Vučijak. Ova aktivnost predstavljala je spoj edukacije, druženja i boravka u prirodi. Učenici su imali priliku upoznati se sa životom konja, njihovom njegom i značajem zaštite životinja. Posmatranje dresure konja i boravak u prirodnom okruženju doprinijeli su razvoju empatije, odgovornosti i svijesti o

U Banovićima, pod mentorstvom Belmina Pleščića, Emine Hašarić i Amela Selimovića, realizovan je edukativni obilazak Muzeja rudarstva i željeznice. Stipendisti su se upoznali sa historijom rudarske djelatnosti, razvojem željezničkog saobraćaja i značajem rudnika za razvoj lokalne zajednice. Posebna pažnja posvećena je upoznavanju učenika sa radnim akcijama i izgradnjom pruge Brčko–Banovići, čime je dodatno naglašen značaj zajedničkog rada, solidarnosti i razvoja društva kroz historiju.



Sve navedene aktivnosti predstavljaju samo dio plemenitog rada i truda koji naši stipendisti ulažu za opće dobro, potvrđujući da obrazovani, odgovorni i društveno angažovani mladi ljudi predstavljaju jednu od najvažnijih snaga za razvoj Bosne i Hercegovine. Kroz volontiranje su pokazali da istinske promjene počinju od pojedinca, a da se zajedničkim radom mogu ostvariti značajni rezultati u oblasti obrazovanja, humanitarnog djelovanja, očuvanja kulturne baštine, promocije zdravlja i razvoja zajednice.

Fondacija Hastor kroz svoj mentorski i stipendijski program kontinuirano ulaže u razvoj mladih ljudi, pružajući im priliku da kroz obrazovanje i volontiranje postanu lideri pozitivnih promjena. Upravo su aktivnosti realizovane tokom ovog mjeseca dokaz da stipendisti Fondacije Hastor ne ulažu samo u vlastito obrazovanje, nego i u razvoj svojih lokalnih zajednica, promovirajući vrijednosti solidarnosti, humanosti, znanja i društvene odgovornosti koje ostavljaju dugoročan pozitivan trag u društvu.

Pripremila: Ajna Šido

Pozivamo Vas da se pridružite našoj misiji i doprinesete ispunjenju snova perspektivnih učenika i mladih ljudi koji trebaju našu pomoć!

Podržite nas.

Ukoliko želite podržati rad Fondacije Hastor, uplatu donacije možete izvršiti na jedan od transakcijskih računa.

ASA Banka dd Sarajevo

1346101000825159

Raiffeisen Bank BH dd Sarajevo

1610000055230065

Unicredit Bank dd Sarajevo

3389002201775656



FONDACIJA
HASTOR



Kontaktirajte nas!

Bulevar Meše Selimovića
16, Sarajevo
033 774 789
033 774 823
fondacija@hastor.ba



Redakcija

Lamija Karađuz
Lamija Sejdić
Aida Suljić
Adina Jusufspahić
Ajna Šido
Amina Bašić
Emra Kulo Begić



Grafički dizajn

Salko Hamzić